



Komunikado di prensa 2019-047

Gobernansa i areglo di emergensia Ennia

Willemstad/Philipsburg – CBCS ta reakshoná aki riba komentaronan hasi den media relashoná ku e karta di 11 di novèmber último di e hunta di komisario (RvC) di e kompanianan di trabou di Ennia.

CBCS a reuní ku Sr. Metry, presidente di e RvC enbolbí, relashoná ku e karta menshoná.

Durante dje kombersashon aki CBCS a enfatisá ku e karta ta kontené hopi echo inkorekto i ku e komisarionan aparentemente a sali for di informashon robes. Ámbos banda ta lamentá ku e karta a bira públiko. CBCS ta haña importante pa koregí e erornan mas prinsipal den e karta pa públiko.

Gobernansa bou di e areglo di emergensia

E areglo di emergensia ta un medida ekstremo ku ta pronunsiá solamente den kaso ku un banko òf kompania di seguro ta den problemanan serio. E sirkunstansianan ei ta hustifiká un régimen spesial i eksepsional, esaki kontrali na gobernansa di un kompania ku ta funshoná normal. Pa por ehekutá su tarea bou di e areglo di emergensia, CBCS a base di lei ta ehersé kompetensianan di tantu e gerentenan komo e komisarionan.

Pa motibunan di kapasidat, ekspertisio i konfidensialidat CBCS a skohe konsientemente den e kaso di Ennia pa mantené un liña di separashon bon kla entre e aktividatnan operashonal i e aktividatnan di restrukturashon. Na e kompanianan di trabou a apoderá personanan pa komo gerensia manhá e aktividatnan operashonal i otronan pa komo komisario supervisá e maneho.

Di e forma aki CBCS por konsentrá riba ehekushon di su enkargo bou di e areglo di emergensia, esta e restrukturashon. Ta deliberá ku regularidat tokante progreso i gastunan di e

restrukturashon ku e hues ku a pronunsiá e areglo di emergensia i no ku e apoderadonan, ku ta aktua pa i na nòmber di CBCS. Pues e hues ta na altura di e gastunan hasí i tambe esnan pendiente relashoná ku e areglo di emergensia i ku a presupuestá komo tal. Konforme e disposishonnan legal di e areglo di emergensia, CBCS lo emití un relato na minister di Finansa na momentu ku ta deskontinuá e areglo di emergensia.

Importansia di e areglo di emergensia

E problemanan serio na Ennia ta kousá pa salidanan di sènnan di aseguradonan na gran eskala i sin outorisashon. Esaki CBCS a konstatá te ainda a base di investigashon profundo. Relashoná ku esaki CBCS a inisiá òktober último un prosedimentu hudisial den kua a pone Ansary i su kolaboradónan responsabel i ta reklamá sènnan na bienestar di e aseguradonan.

Na e momentu aki tin diferente investigashon ta kanando kual ta duna indikashon ku otro èks-funshonarionan tambe lo wòrdu enbolbí den un prosedimentu hudisial. E prosedimentunan i dañonan di perhuisio den kua esaki lo resultá, lo sirbi pa rekuperá e solvensia di Ennia ku e meta ku Ennia por kumpli kompletu ku su kompromisonan riba término largu na aseguradonan. E metanan aki ta hustifiká sin kita sin pone mantenshon di e areglo di emergensia.

Prosedimentunan hudisial no ta un meta riba su mes. Akaso e funshonarionan responsabel ku a perhudiká Ennia boluntariamente paga bèk e daño ku nan a kousa na Ennia, respektivamente a enrikesé nan mes a kosto di Ennia, por legumai un prosedimentu.

Balor Mullet Bay

Ansary i su kolaboradornan a hisa e balor di Mullet Bay na Sint Maarten te na un suma di mas ku NAf. 750 mion pa asina legitimá sakamentu di sènnan di aseguradonan di Ennia.

Den e petishon di e prosedimentu pa daño di perhuisio ta pará ampliamente deskribí kon nan a konstruí esaki. E balor di e sitio a base di un taksashon ehekutá pa un kompania di taksashon internashonal independiente di renombre ta konsiderablemente mas abou. Disputanan di e balor pa Ansary i su kolaboradónan te ainda den prosedimentunan hudisial no a duna fruta.

Na final

Pasombra e karta di RvC ta kontené hopi eror i ta komentá den media, a surgi impreshonnan no korekto tokante funshonamentu di Ennia bou di e areglo di emergensia. Ademas nan ta pone CBCS inhustamente den un lus di dia robes. CBCS ta sigui sin kambio di rumbo ku su plan pa

restrukturá Ennia i rekobrá sènnan ku a sali na bienestar di e aseguradonan. Un tim di spesialistanan di CBCS, abogadonan i eksperto finansiero ta traha diariamente pa logra esaki.

Ta importante pa den trankilidat relativo por traha pa logra esaki manteniendo konfidensialidat. Manera a sosodé te ainda, CBCS lo anunsiá prosedimentunan entamá i nan resultado. Asina por duna mas informashon tokante e restrukturashon, lo duna esaki.

Willemstad, 22 di novèmber 2019

CENTRALE BANK VAN CURAÇAO EN SINT MAARTEN